

四庫全書

經部

欽定四庫全書

經部

五禮通考卷一百三十三

詳校官太常寺少卿_臣陳桂森

給事中_臣溫常綬覆勘

總校官進士_臣繆琪

校對官中書_臣孫球

謄錄舉人_臣郭履元

欽定四庫全書

五禮通考卷一百二十三

刑部尚書秦蕙田撰

嘉禮六

朝禮

蕙田案周制天子三朝惟路門外之朝曰治
朝王曰眡朝于此即後世所謂常朝也古者
三公坐而論道王眡朝則冢宰贊聽治大僕

正位百官各從表著之位上下之分至嚴君臣之情至親凡邦國之利病政事之得失民生之疾苦無有壅于上聞者秦漢以降迄于南北朝史志詳于朝會之儀注而常朝闕如自唐以後其儀始備唐常朝于太極殿其在大明宮則于宣政殿貞觀初每日臨朝十三年三日一朝永徽中五日一朝仍有朔望朝開元禮有朔日受朝其後又有紫宸殿入閣

中葉以還又有開延英召對敬宗定以朔望
入閣昭宣帝時定一五九日開延英後唐明
宗始詔羣臣五日一詣內殿起居仍復朔望
入閣宋制文武官每日赴文明殿正衙曰常
叅五日一赴崇德殿或垂拱殿曰起居而外
別有入閣之儀但唐之入閣御便殿也其禮
視正衙為簡宋之入閣御前殿也其禮視正
衙為繁則非唐舊矣熙寧以後罷入閣儀重

定朔望御殿之制政和新儀有文德殿月朔
視朝紫宸殿望叅垂拱殿四叅紫宸殿日叅
垂拱殿日叅崇政殿假日起居遼有常朝起
居儀太宗至燕御元和殿入閣金以朔望日
為朝叅餘日為常朝元惟宰執每日入延春
閣及別殿奏事明常朝有御殿儀有御門儀
每日晨興御奉天門至午晚復出坐朝其後
御殿之禮廢午晚二朝亦廢景泰弘治始復

午朝未幾旋罷至世宗神宗之世常朝御門
數十年不一舉焉常朝儀宋志列之賓禮今
依通典明集禮會典作嘉禮而繼周官朝禮
之後蓋視朝之正禮也

史記秦始皇本紀三十五年始皇以為咸陽人多先王
之宮廷小吾聞周文王都豐武王都鎬豐鎬之間帝王
之都也乃營作朝宮聽事羣吏受決事悉于咸陽宮

二世二年趙高說二世曰先帝臨制天下久故羣臣不

敢為非進邪說今陛下富于春秋初即位奈何與公卿
廷決事事即有誤示羣臣短也天子稱朕固不聞聲于
是二世常居禁中與高決諸事其後公卿希得朝見

蕙田案周制王日昃朝秦去古未遠故始皇
梁父刻石云既平天下不懈于治夙興夜寐
建設長利則猶知聽政之勤也至二世信趙
高邪說居禁中與高決事而朝禮始廢矣

漢書宣帝本紀地節二年上始親政事五日一聽事

續漢書禮儀志注胡廣曰舊儀公卿以下每月常朝
先帝以其頻故省惟六月十月朔朝後復以六月朔
盛暑省之

三國魏志文帝本紀黃初五年五月有司以公卿朝朔
望日因奏疑事聽斷大政論辦得失

魏志齊王本紀景初元年正月即位七月始親臨朝聽
公卿奏事

宋書孝武帝本紀孝建三年二月丁丑始制朔望臨西

堂接羣下

梁書武帝本紀大同六年八月辛未詔曰經國有體必
詢諸朝所以尚書置令僕丞郎旦旦上朝以議時事
共籌懷然後奏聞頃者不爾每有疑事倚立求決古人
有云主非堯舜何得發言便是是故放勳之聖猶咨四
岳重華之叡亦待多士豈朕寡德所能獨斷自今尚書
中有疑事前于朝堂參議然後啟聞不得習常其軍機
要切前須諮審自依舊典

北魏書楊亮傳高祖臨朝堂謂亮曰三代之禮日出視朝自漢魏已降禮儀漸殺晉令有朔望集公卿于朝堂而論政事亦無天子親臨之文今因卿等日中之集中前則卿等自論政事中後與卿等共議可否遂命讀奏案高祖親自決之

蕙田案讀奏案親自決之今之御門大學士進御前內閣學士讀本請旨即其意也

前廢帝本紀普泰元年四月詔員外諫議大夫步兵校

尉奉車都尉羽林監給事中積射將軍奉朝請其七品以上朔望入朝

止齋書孝昭本紀帝日昃臨朝訪問左右冀獲直言

後周書武帝本紀保定三年五月甲子朔避正寢不受朝旱故也

建德二年秋七月自春末不雨至于月壬申集百寮于大德殿帝責躬罪已問以政治得失

隋書高祖本紀上每旦臨朝日昃忘倦

右秦至隋常朝

唐六典太極殿朔望坐而視朝兩儀殿常日聽朝而視事

唐書職官志文武官職事九品以上及二王後朝朔望文官五品以上及兩省供奉官監察御史員外郎太常博士日叅號常叅官武官三品以上三日一朝號九叅官五品以上及折衝當番者五日一朝號六叅官弘文崇文館國子監學生四時叅凡諸王入朝及以恩追至

者日叅九品以上自十月至二月袴褶以朝五品以上有珂蕃官及四品非清官則否

文獻通考貞觀元年十一月梁州都督竇軌請入朝上曰君臣共事情猶父子外官久不入朝情或疑懼朕亦須數見之問以人間風俗許令入朝

慈田案此外官入朝也

貞觀十三年十月尚書左僕射房玄齡奏天下太平萬機事簡請三日一臨朝許之

通典貞觀十五年正月太宗謂侍臣曰古者諸侯入朝有湯沐邑芻禾百車待以客禮漢家故事為諸州刺史郡守創立邸舍于京城頃聞都督刺史充考使至京師皆賃房與商人雜居既優禮之不足必是人多不便至十七年十月下詔令就京城內閑坊為諸州朝集使各造邸第三百餘所太宗親觀幸焉

貞觀二十二年十月令百僚朔望服袴褶以朝

冊府元龜高宗以貞觀二十三年即位九月十一日太

尉無忌等奏請視朝坐日上報曰朕登大位日夕孜孜猶恐擁滯衆務自今以後每日常坐

永徽二年八月二十九日詔來月一日太極殿受朝此後每五日一度太極殿視朝朔望朝即永為常式京官文武五品依舊五日一參

顯慶二年太尉長孫無忌等奏以天下無虞請隔日視事許之

文獻通考中宗神龍元年初令文武官五品以上每朔

望叅日升殿食四月上以時屬炎暑制令每隔日不坐
右拾遺靳恒上疏諫曰臣聞昔漢制反支日亦通奏事
又光武在軍躬自覽疏明帝撫運夜必讀書豈以四氣
炎寒妨於政理竊為陛下不取

冊府元龜先天二年二月太上皇誥正月十五日朝改
取十一日每年皆然又非朔望而同朔望受朝者前後
有誥非一

文獻通考先天二年勅文武官朝叅應著袴褶珂繖者

其有不著入班者各奪一月俸若無故不到者奪一季
祿其行香拜表不到亦準此頻犯者量事貶降其衣冠
珂繖仍許著到曹司十月勅諸蕃使都府管羈縻州其
數極廣每州遣使朝集頗成勞擾應須朝賀委當蕃都
督與上佐及管內刺史自相通融明為次第每年一蕃
令一人入朝給左右不得過二人仍各分領諸州貢物
於都府點檢一時錄奏

開元中蕭嵩奏每月朔望皇帝受朝於宣政殿先列仗

衛及文武四品以下於庭侍中進外辦上乃步自西序
門出昇御座朝罷又自御座起步入東序門然後放仗
散臣以為宸儀肅穆升降俯仰衆人不合得而見之乃
請備羽扇於殿兩廂上將出所司承旨索扇扇合上座
定乃去扇給事中奏無事上將退又索扇如初今以為
常

蕙田案開元禮朔日受朝儀與此畧同而加
詳彼云受朝於太極殿據在大內而言此云

宣政殿據在大明宮而言也

唐開元禮朔日受朝

其朔日讀時令則不行此禮

前一日尚舍奉御設御

幄於太極殿北壁南向守宮設文官次於朝堂如常儀
太樂令展宮懸於殿庭設舉麾位於殿上西階之西東
向一位於樂懸東南西向並如常儀其日典儀設文官
三品以上位於橫街之南道東設武官三品以上位於
道西俱每等異位重行北面相對為首設文官四品五
品位於懸東六品以下於橫街之南每等異位重行西

面北上設武官四品五品位於懸西六品以下於橫街之南當文官每等異位重行東面北上設典儀位於樂懸東北贊者二人在南少退又奉禮設門外位文官於東朝堂西面武官於西朝堂東面皆每等異位重行北上其日依時刻諸衛勒所部列仗屯門及陳於殿庭如常儀羣官朝集官俱就次各服公服吏部兵部贊羣官俱出次通事舍人各引就朝堂前位侍中版奏請中嚴鈇戟近仗入陳於殿太樂令帥工人入就位協律郎入

就舉麾位諸衛之官各服其器服符寶郎奉寶俱詣閣
奉迎典儀司贊者入就位通事舍人引四品以上先入
就位侍中版奏外辦有司承旨索扇皇帝弁服絳紗衣
御輿以出曲直華蓋警蹕侍衛如常儀皇帝將出仗動
太樂令令撞黃鐘之鐘右五鐘皆應協律郎跪俯伏舉
麾鼓祝奏太和之樂皇帝出自西房即御座南向坐符
寶郎奉寶置於御座如常儀協律郎偃麾戛敔樂止通
事舍人引三品以上以次入就位公初入門舒和之樂

作至位樂止立定典儀曰再拜贊者承傳在位者皆再拜典儀又曰再拜贊者承傳羣官在位者又再拜舍人引羣官北面位者以次出公初行樂作出門樂止侍中前跪奏稱侍中臣某言禮畢俯伏興還侍位有司承旨索扇皇帝興太樂令令撞蕤賓之鐘左五鐘皆應奏太和之樂皇帝降座御輿入自東房侍衛警蹕如來儀侍臣從至閣樂止舍人引東西面位者以次出皇帝若御翼善冠則羣臣皆服袴褶不設樂懸去警蹕

朝集使引見

奉辭附

前一日尚舍奉御先奏於御殿所設御

座如常儀其日依時刻所司量加隊伍陳列如常式典儀於殿庭橫街之南止設版位如常儀其日朝集使夙興並集朝堂各服其服朝京官文武九品以上並服袴褶諸侍奉官及京官文武四品以上就位如式通事舍人引京官文武三品以上及朝集使俱就所御殿門外序立以次侍中進奏外辦皇帝常服即御座南向坐侍衛如常儀通事舍人分引京官文武三品以上詣橫街

南相對北面位立定典儀曰再拜羣官在位者皆再拜

訖通事舍人各引就街北東西班停立又通事舍人分

引朝集使入北面位

東方南方在東西方北方在西

立定典儀曰再拜朝集

使等俱再拜通事舍人承旨詣朝集使東北面立稱有

制朝集使等皆再拜舍人宣勅訖又再拜

答制先定行首一人跪奏舍人為奏

聽進止

若承恩慰問即舞蹈訖又再拜舍人宣勅訖侍中奏

禮畢皇帝還宮如來儀侍臣退羣官等以次退其朝集

使奉辭皆準奉叅之儀其京官但常叅官列版位其朝

集使三品以上引升殿賜食四品以下於廊下賜食並
臨時奏聽進止

冊府元龜開元二十二年閏十一月詔諸州考使六品
以下朔望日朝宜準例賜食

通典天寶三載二月勅百官朔望朝叅應服袴褶并著
珂傘至閏二月一日宜停自今以後每逢此閏仍永為
恒式

舊唐書元宗本紀天寶五載夏五月庚申勅今後每至

旬節休暇中書門下文武百僚不須入朝外官不須衙
集

通典天寶六載九月勅自今以後每朔望於常儀一刻
進外辦每坐喚仗令朝官從容至閤門入至障外不須
趨走百司無事至午後放歸無為守成宜知朕意

蕙田案入閤之禮始於此

文獻通考入閤唐制起於天寶明皇以無為守成詔宴
朝喚仗百官從容至閤門入蓋唐前舍元殿非正至大

朝會不御次宣政殿謂之正衙每坐朝必立仗於正衙或御紫宸殿即喚正衙仗自宣政殿兩門而入是謂東西上閣門故謂之入閣其後遂為常朝之儀

宋史禮志唐制天子日御正衙以見羣臣必立仗朔望薦食陵寢不能臨前殿則御便殿乃自正衙喚仗由宣政兩門而入是謂東西上閣門羣臣俟於正衙者因隨以入故謂之入閣五代以來正衙既廢而入閣亦希閣不講宋復行之

蕙田案通考與宋志所載入閣之說不同今以冊府元龜考之則通考為得之矣蓋唐制正衙每日有立仗玄宗以正衙體嚴而御便殿以接羣下喚仗入閣示無為守成之意故不特朔望入閣常日亦可入閣何者御便殿原無常期也冊府元龜載大歷中間日坐朝雙日不復入閣然則入閣可間日行之何必朔望耶冊府元龜又云故事朔望日皇帝御

宣政殿謂之大朝

此即開元禮所載

元宗始以朔望

陵寢薦食不聽政其後遂以為常憲宗元和

十年三月朔御延英殿召對宰臣特以事召

非故事也夫入閣接見羣臣所以聽政曰不

聽政則并入閣亦廢之矣且入閣之儀於紫

宸殿行之雖云便殿固內朝之正殿也延英

則非正殿矣朔望薦食延英且不御況御紫

宸乎竊意天寶以後元宗怠于政事始則借

為守成之名變正衙之朝而為入閣繼則借
薦食陵寢之說并朔望入閣亦廢之其後習
以為常有常日入閣無朔望入閣矣德宗以
後率於延英召對宰臣而常日入閣又復不
講至敬宗復入閣之儀則專於朔望行之此
禮之變也宋志以朔望薦食不聽政亦起於
元宗遂與入閣并為一事誤矣

又案宋張洎宋庠宋敏求皆以入閣為唐集

日紫宸殿受常朝之儀不云朔望其說得之
冊府元龜天寶六載正月詔曰今勝殘在運無事為心
顧此朝儀當符至理既時非旰食將致昇平而廷設殺
刑何成在宥其每日立仗食及杖鋌等並宜停廢十一
月辛卯朔引朝集使及貢舉人見十二月丙寅仗下後
百官於尚書省閱貢物

通典天寶十二載十一月御史中丞吉溫奏請京官朔
望朝叅著朱衣袴褶五品以上著珂傘制曰可

蕙田案此朱衣袴褶之始

文獻通考肅宗乾元三年勅員外郎五品以上常叅官

自今以後非朔望日許不入賊平之後依舊常叅

時安史據河洛

通典代宗廣德二年勅常叅官遇泥雨准儀制令例停
朝叅今軍國事殷若准式停恐有廢闕泥既深阻許延
三刻傳點待道路通依常式以後亦宜准此

冊府元龜大歷九年十一月是時四方無事間日坐朝
雙日不復入閣

十二年八月以久雨宥常叅百寮不許御史點班

舊唐書德宗本紀建中元年十一月辛酉朔朝集使及貢士見於宣政殿兵興以來四方州府不上計内外不會同者二十五年至此始復舊典

州府計吏至者一百七十有三

文獻通考建中二年御史中丞竇叅奏准儀制令泥雨令停朝叅伏以軍國事殷恐有廢闕請令每司長官一人入朝有兩員併副貳亦許分日其夜甚雨至明不止許令仗下到廊食訖入中書其餘官及王府長官並請

停朝任於本司勾當公事泥雨經旬亦望准此

是年舉故事置武班

朝其廊下食等亦宜加給

冊府元龜貞元元年七月關中蝗食禾稼無孑遺八月
甲子詔不御正殿奏事悉於延英庚寅視朝於延英殿
羣臣列位於延英殿門外申甲子之詔也丁丑雨戊寅
中書門下上言陛下前以愆陽經時避居正殿凡在臣
庶無任兢惶今至誠感通嘉雨霑洽兇渠授首同類格
心臣等敢昧死請自今以後依常儀御正殿詔曰可

蕙田案開延英殿始見於此

文獻通考開延英儀內中有公事商量即降宣頭付
閣門開延英閣門翻宣申中書并榜正衙門如中書
有公事敷奏即宰臣入榜子奏請開延英祇是宰臣
赴對閣門使奏宰臣某已下延英候對宣徽使殿上
宣通次閣門使奏中書門下到次宣徽使喚次閣門
使傳聲喚次通事舍人引宰臣當殿立贊兩拜搢笏
舞蹈又三拜奏聖躬萬福又兩拜金口宣上來又兩

拜通事舍人引上殿至御座前又兩拜問聖體皇帝
宣安又兩拜三呼萬歲各分班案前立定兩樞密使
在御榻兩面祇候其餘臣僚並約赴外次奏事訖宣
賜茶又兩拜三呼萬歲賜坐吃茶對訖下殿兩拜宣
賜酒食舞蹈謝恩訖宣徽使喝好去就中書喫食延
英畢次兩省官轉對閣門使當殿奏某已下轉對宣
徽使殿上宣通次閣門使奏某已下到次宣徽使喚
次閣門使傳聲喚次通事舍人引當殿立定贊兩拜

搢笏舞蹈又三拜奏聖躬萬福又兩拜殿下奏事訖
宣賜酒食又兩拜舞蹈謝訖閤門使喝好去南班揖
殿出於省就食次對官御史中丞三司使京兆尹並
各奏所司公事次閤門使奏某祇候次對宣徽使殿
上宣通次閤門使奏某到次宣徽使喚次閤門使傳
聲喚次通事舍人引當殿立定贊兩拜搢笏舞蹈三
呼萬歲又三拜訖奏聖躬萬福又兩拜奏所司公事
宣賜酒食又兩拜舞蹈謝訖閤門使喝好去南班揖

殿出於客省就食合赴延英中謝官文武兩班三品
及御史中丞左右丞諸侍郎諫議給事中書舍人并
諸道節度觀察防禦團練使刺史兩縣令皆入謝並
通喚文武四品以下及諸道行軍司馬節度副使兩
使判官書記支使推巡令錄等舊例并不對殿中謝
祇於正衙朝謝

蕙田案馬氏通考載開延英儀於貞元二年
勅之後然閣門使宣徽使三司使唐時無此

官制而宋又無開延英之儀當是五代所定之儀或昭宣帝時開延英有之今不可定以延英奏事始於貞元故附見於此并存疑以俟考

舊唐書德宗本紀貞元三年春三月庚寅詔今年朝集使宜停

文獻通考貞元七年詔常參官入閣不得奔走其有周以下喪者禁襴服朝會復衣綾袍金玉帶初金吾將軍

沈房有弟喪公服不衣襖服入門上問宰臣董晉對曰
准式朝官有周以下喪者許服絕縵衣不合淺色上曰
南班何得有之對曰因循而然又曰在式朝官皆以綾
為袍五品以上服金玉帶取其文綵華飾以奉上也昔
尚書郎含香此意也

冊府元龜貞元十三年正月御史臺奏諸司常叅文武
隔假三月以上並橫行叅假其武班每日先配九叅六
叅比來或經冬至及歲首寒食等三節假滿不是本配

入日並不橫行事實乖闕請從今以後每經三節假滿不是本配入日其前件官請依文官例橫行叅假庶幾周行式序可之五月帝以累月天陰街鼓聲暗百官入朝多走馬奔馳令宣示宰臣及百官曰卿等朝謁是常或陰雨不聞鼓聲則不免奔波走馬忽有墜損深軫朕懷自今以後縱鼓聲差池亦不得走馬并時暑稍甚及雨雪泥潦亦量放朝叅宰臣等上表陳謝

文獻通考憲宗元和元年三月准吏部兵部尚書侍郎

郎官并禮部侍郎御史中丞武元衡奏近起十月至來
年三月稱在選舉限內不奉朝叅令式無文禮敬斯闕
一年之內半歲不朝去貞元十二年中丞王顏奉勅釐
革載在明文尋又因循輒自更改若以兵吏禮部舉選
限內事繁即中書門下御史臺度支京兆府公事至重
朝請如常又況旬節已賜歸休常叅又許分日一月之
內才奉十日朝叅其間甚熱甚寒皆蒙班放臣以為王
顏舉奏甚詳當時勅文甚備准貞元十一年四月勅旨

自今以後永為常式他年妄改條請委臺司彈奏庶使班行式叙典法無虧依奏

舊唐書憲宗本紀元和元年三月己未武元衡奏常叅官兼御史大夫中丞者准檢校省官例立在本品同類之上

二年十二月癸亥御史臺奏文武常叅官准乾元元年三月十四日勅如有朝堂相弔慰及跪拜待漏行立失序語笑喧嘩入衙入閣執笏不端行立遲慢立班不正

趨拜失儀言語微喧穿班穿仗出入閤門無故離位廊下飲食行坐失儀誼闢入朝及退不從正衙出入非公事入中書等每犯奪一月俸班列不肅所由指摘猶或飾非即具聞奏貶責臣等商量於舊條每罰各減一半所貴有犯必舉從之

冊府元龜元和二年二月己巳宰臣延英罷對起居舍人鄭隨次對詔入面受進止令宣付兩省供奉官自今以後有事即進狀來其次對宜停初貞元七年詔每御

延英引見常叅官二人訪以政道謂之次對官所以廣
視聽也宰臣奏罷時議非之六月丁巳朔百官初入待
漏院候禁門啟入朝故事建福望仙等門昏而闔五更
而啟與諸里門同時至德中有吐蕃內自金吾仗亡命
因勅晚開宰相待漏於太僕寺車坊至是始命有司各
據班品置院於建福門外

唐國史補舊百官早朝必立馬於望仙建福門外宰
相於光宅車坊以避風雨元和初始制待漏院

蕙田案此制待漏院之始

冊府元龜元和六年十二月庚午以苦寒放朝五日

七年四月壬子開延英對宰臣以下 八年十月丙辰

以大雪放朝三日 九年六月癸卯以時暑甚放百官

五日參 十年三月壬申朔御延英殿召對宰臣故事

朔望日皇帝御宣政殿見羣臣謂之大朝元宗始以朔
望陵寢薦食不聽政其後遂以為常今之見宰臣特以
事召也 六月勅御史臺自今以後常叅官入朝以見

到人名銜進來其朔望及雙日莫進

舊唐書憲宗本紀元和十四年上謂宰臣曰天下事重一日不可曠廢若遇連假不坐有事即詣延英請對崔羣以殘暑方甚目同列將退上止之曰數日一見卿等時雖暑熱朕不為勞久之方罷

冊府元龜穆宗長慶二年八月詔曰夏秋之間常多水潦如緣暮夜暴雨道路不通車馬宜便放其日朝叅委御史臺勾當仍每日奏如雨不至甚即不在此例

敬宗以長慶四年正月即位二月辛丑御紫宸殿羣臣初展入閣之儀

葉氏夢得曰唐正衙日見羣臣百官皆在謂之常參
喚仗入閣百官亦隨以入則唐制天子未嘗不日見
百官也其後不御正衙紫宸所見惟大臣及內諸司
百官俟朝於正衙者傳聞不坐即退則百官無復見
天子矣敬宗再舉入閣禮之後百官復存朔望兩朝
唐書李渤傳渤諫議大夫時敬宗晏朝紫宸入閣帝久

不出羣臣立屏外至頓仆勅見宰相曰昨論晏朝事今
益晚是諫官不能移人主意勅請出閣待罪會喚仗乃
止退上疏曰今日入閣陛下不時見羣臣羣臣皆布路
跛倚夫跛倚形諸外則憂思結諸內憂倦既積災釁必
生小則為旱為孽大則為兵為亂禮三諫不聽則逃之
陛下新即位臣至三諫恐危及社稷又言左右常侍職
規諫循默不事若設官不責實不如罷之

舊唐書文宗本紀太和元年六月辛卯朔勅文武常參

官朝叅不到據料錢多少每貫罰二十五文

冊府元龜開成元年正月己酉詔以入閣日次對官班退立於東階松樹下須宰臣奏事畢齊至香案前各言本司事左右起居又待次對官奏事畢方出

舊唐書昭宣帝本紀天祐二年十二月辛丑勅漢宣帝中興五日一聽朝歷代通規永為常式近代不循舊儀輟隳制度致姦邪之得計致臨視之失常須守舊規以循定制宜每月只許一五九日開延英計九度其入閣

日仍於延英日一度指揮如有大段公事中書門下具
膀子奏請開延英不計日數付所司又勅宮嬪女職本
備內任近年以來稍失儀制宮人出內宣命案御叅隨
侍朝乃失舊規須為永制今後每遇延英坐朝日只令
小黃門祇候引從宮人不得擅出內門庶循典儀免至
紛雜

見聞錄唐會要天祐二年勅今後每遇延英坐朝日
只令小黃門祇候引從宮人不得擅出內乃知杜詩

戶外昭容紫袖垂雙瞻御座引朝儀者真出殿引坐而鄭谷入閣詩亦言導引出宮鈿蓋至天祐始罷

三年六月壬寅勅文武百寮每月一度入閣於貞觀殿朝廷正衙遇至正之辰受羣臣朝賀比來視朝未正規儀今後於崇勲殿入閣付所司

蕙田案昭宣帝以天祐元年八月即位不改元四年而禪梁冊府元龜載此二勅以為昭宗天復二年三年之事文獻通考則云昭宗

天祐二年三年不知昭宗崩在元年皆誤也
今以舊唐書本紀為正

冊府元龜天祐二年四月勅自今年五月一日後常朝
出入取東上閣門或遇奉慰即開西上閣門永為定制
憲田案冊府元龜載天復三年文武兩班官
員遇一五九朝日元帥朱全忠請排廊餐賜
詔獎飭仍付所司案一五九日開延英之制
既定於天祐二年則此事亦當在天祐三年

可知今附見於此

右唐常朝

冊府元龜後唐莊宗同光元年十二月中書門下奏每日常朝百官皆拜獨兩省官不拜准本朝故事朝退於廊下賜食謂之廊餐百僚遂有謝食拜惟兩省官本省有厨不赴廊餐故不拜伏自僖宗幸蜀廻以多事之後遂廢廊餐百官拜儀至今未改將五十載禮恐難停惟兩省官獨尚不拜豈可終日趨朝曾不一拜獨於班列

有所異同若言官是近臣於禮尤宜肅敬起今後逐日常朝宣不坐除職事官押班不拜外其兩省官與東西兩班並齊拜從之

二年正月庚申四方館奏常朝諸職員多有參雜今後除隨駕將校外方進奉專使文武兩班三品以上官可於內殿對見其餘並詣正衙以申常禮從之八月癸巳宣旨放三日朝叅以霖雨甚故也

三年正月以百官扈從之勞放十九日至二十日朝叅

六月癸酉勅泥塗稍甚放文武常叅三日丁亥以霖雨放朝七月乙未勅霖雨未止泥塗頗甚宜放五日六日朝叅戊戌勅泥塗頗甚放八日九日朝叅丁亥以霖雨放朝八月己丑勅如聞天津橋未通往來百官以舟船濟渡因滋傾覆無路泥塗自今文武百官三日一趨朝宰臣即每日中書視事

明宗天成元年五月丁巳內出御劄一封賜宰臣曉示文武百僚每日正衙常朝外五日一度赴內殿起居宰

臣百官班於文明殿庭謝其中書非時有急切公事請
開延英不在此限乙酉勅每月十五日賜廊下食本朝
承平時常叅官每日退朝賜食廊下謂之廊餐自乾符
亂離已後庶事草創有司經費不足無每日之賜但遇
月旦入閣日賜食帝初即位始因諫官疏奏請文武百
寮五日一起居見帝於便殿李琪以為非故事以五日
為繁請每月朔望日皆入閣賜廊下食罷五日起居之
儀至是宣每月朔望皆入閣依奏五日一度起居不得

停廢遂以為常

五代史李琪傳唐末喪亂朝廷之禮壞天子未嘗視朝而入閣之制亦廢常參之官日至正衙者傳聞不坐即退獨大臣奏事日一見便殿而侍從內諸司日再朝而已明宗初即位乃詔羣臣五日一隨宰相入見內殿謂之起居琪以為非唐故事請罷五日起居而復朔望入閣明宗曰五日起居吾思所以數見羣臣也不可罷而朔望入閣可復然唐故事天子日御

殿見羣臣曰常參朔望薦食諸陵寢有思慕之心不能臨前殿則御便殿見羣臣曰入閣宣政前殿也謂之衙衙有仗紫宸便殿也謂之閣其不御前殿而御紫宸也乃自正衙喚仗由閣門而入閣官俟朝於衙者因隨以入見故謂之入閣然衙朝也其禮尊閣宴見也其禮殺自乾符以後因亂禮闕天子不能日見羣臣而見朔望故正衙常日廢仗而朔望入閣有仗其後習見遂以入閣為重至出御前殿猶謂之入閣

其後亦廢至是而復然有司不能講正其事凡羣臣
五日一入見中興殿便殿也此入閣之遺制而謂之
起居朔望一出御文明殿前殿也反謂之入閣琪皆
不能正也琪又建言入閣有待制次對官論事而內
殿起居一見而退欲有言者無由自陳非所以數見
羣臣之意也明宗又詔起居日有言事者許出行自
陳又詔百官以次轉對

五代會要天成元年五月十九日勅本朝舊日趨朝官

置待漏院候子城門開便入立班如遇不坐前一日晚
便宣來日兩衙不坐其日纔明閣門立班便宣不坐百
官各退歸司近年以來雖遇不坐正殿或是延英對宰
臣或是內殿親決機務所司不循舊制往往及辰已之
時尚未放班既日色已高人心咸倦今後若遇不坐日
未御內殿前便令閣門使宣不坐放朝班退

冊府元龜天成元年八月壬辰以積雨泥甚放百僚朝
參已亥帝御文明殿百官入閣如月朔之儀從新例也

九月丙辰帝御文明殿入閣新制次日例也十月右拾遺曹珍上疏內一件百寮朔望入閣及五日一度內殿起居請許三署寺監官輪次轉對奏事從之

二年正月丙申詔曰君使臣以禮臣事君以忠禮不可一日不修忠不可一夕不念二者全則上下順一途廢則出入差須振綱維以嚴規矩凡在策名之列皆知辨色而朝儻不夙興是虧匪懈君上思政猶自求衣未明為下服勤固合假寐待旦宜令御史臺編示文武兩班

自此每日早赴朝參職司既得整齊公事的無壅滯如
或尚茲懈怠具錄奏聞

文獻通考三年中書門下奏逐日常朝宣奉勅不坐兩
省官與東西兩班並拜押班宰臣不拜或間班行所論
承前有廊餐百官謝食兩省即各有常廚從來不拜或
云有侍臣不拜檢尋故實不見明規百官拜為廊餐即
承旨合宣有勅賜食供奉官不拜亦恐非儀且左右前
後之臣日面天顏豈可不拜臣等商量今後常朝押班

宰臣亦拜通事舍人亦拜閤門外放仗亦拜從之

冊府元龜長興元年二月郊祀畢丙辰勅宜放兩日朝
叅以百官行事之勞故也五月庚寅詔諸州得替防禦
團練使刺史並宜於班行比擬如未有員闕可隨常叅
官逐日立班新例也

二年八月癸酉詔文武百官五日內殿起居仍舊其輪
次對宜停若有封事許非時上表朔望入閣待制候對
一依舊制

三年三月乙酉勅文武兩班每遇入閣從官並賜酒食
從前臺官及諸朝官皆在敷政門外兩廊下就食惟北
省官於敷政門內既為隔門各不相見致行坐不齊難
於整肅今後每遇入閣賜食北省官亦宜令於敷政門
外東廊下設席以北為首待班齊一時就坐六月己未
勅以霖雨經旬街衢泥濘文武兩班宜放今月八日朝
叅甲子朔勅放三日朝叅大雨故也

四年八月辛亥以霖雨甚宣旨放入閣

五代史盧文紀傳文紀拜中書侍郎同中書門下平章
事是時天下多事廢帝數以責文紀文紀因請罷五日
起居復唐故事開延英冀得從容奏議天下事廢帝以
為五日起居明宗所以見羣臣也不可罷而使殿論事
可以從容何必延英因詔宰相有事不以時詣閣門請
對

冊府元龜末帝清泰元年六月辛卯御史中丞張鵬奏
文武常叅官入閣內廊下設食每宣放仗拜後就食相

承以為謝食拜臣以每日常朝宣不坐後拜退豈謝食之謂乎如臣所見自今宣放仗拜後且就次候將設食別降使於敷政門外宣賜酒食羣臣謝恩後食從之十一月己巳御史臺奏前任節度防禦團練使等刺史行軍副使近儀五日一度內殿起居皆綴班序立元係班簿雖曰便殿起居其遇全班起居時亦合綴班從之

二年三月庚戌御文明殿羣臣入閣刑法官劇可久待制官李慎儀次對

後晉高祖天福二年二月己未御史臺奏唐朝定令式
南衙常叅文武百僚每日朝退於廊下賜食謂之堂食
自唐末亂離堂食漸廢仍於入閣起居日賜食每入閣
禮畢閣門宣放仗羣官俱拜謂之謝食至偽主清泰元
年中入閣禮畢更差中使至正衙門口宣賜食百寮立
班重謝此則失有唐堂食之意於禮實為太煩臣恐
因循漸失根本起今後入閣賜食望不差中使口宣請
准唐明宗朝事例處分從之 四月丙午御史臺奏文

武百寮每五日一度內殿起居在京城時百官於朝堂幕次自文明殿門入穿文明殿庭入東上閣門至天福殿序班令隨駕百官自到行朝每遇起居日於幕次東出升龍門與諸色人排肩雜進自外繚繞方入內門臣竊見升龍門外庭宇不寬人徒大集或是諸司掌事或是諸道使臣方集貢輸不可止約若令與衣冠雜進朝士並趨則恐有壞天官見輕朝序權時之義事理難安起今後每遇百官赴內殿起居日請依在京事體百官

於幕次自正衙門入東出橫門既協京國常儀兼在行
朝便穩從之 庚戌御史臺奏文武百寮每月朔望入
閣禮畢賜廊下食在京時祇於朝堂幕次兩廊下今在
行朝於正衙門外權為幕次房廊湫隘間架絕少伏恐
五月一日朝會禮畢准例賜食即與幕次難為排比伏
見唐明宗時兩省官於文明殿前廊下賜食今未審每
遇入閣日權於正衙門內兩廊下排比賜食為復別有
處分者勅旨宜依明宗時舊規 六月甲午太妃將至

行闕放文武朝一日十一日中書奏准唐貞元二年九月五日勅文官充翰林學士及皇太子諸王侍讀武官充禁軍職事並不常朝叅其在三館等諸職事者並朝叅訖各歸所務自累朝以來文武在內廷充職兼判三司或帶職額及六軍判官等例不赴常朝元無正勅准近勅文武職事官未升朝者案舊制並赴朔望朝叅其翰林學士侍讀三館諸職事望准元勅處分其在內廷諸司使等每受正官之時來赴正衙謝後不赴常朝大

會不離禁廷位次三次職官免常朝惟赴大朝會其京
司未升朝官員祇赴朔望朝叅帶諸司職掌者不在此
例文官除端明殿翰林學士樞密院學士中書省知制
誥外有兼官兼職者仍各發遣本司供事可之

四年七月壬寅朔帝御崇元殿百官入閣如常禮朔不
入閣日蝕故也閏七月庚子朔百官不入閣雨雪服也
十二月丁酉朔百官不入閣大雪故也

五年正月壬辰馮道奏曰宰臣朝見辭謝在朝堂橫街

之南逮至餘官則悉於崇元門內夫表著之列豈可踰之故古先明王必正其位服此實事因偶爾習以為常又入閣禮畢之時羣官退於門外定班如初俟宣放仗唯翰林學士前任郡守等不隨百辟即時直出二者禮僭序失其使正之帝深然其言於是下詔曰官爵之班即分高下見謝之位豈有異同宜格通規以為定制今後宰臣使相朝見辭謝並於崇元門內與諸官重行異位一時列班橫行以從舊例又入閣之義序班為重宣

喚則齊趨正殿各出朝門何起居之禮即同而進退之
規有異其翰林學士及前任郡守等今後入閣退朝宜
依百官班制

七年五月己亥中書門下奏時屬炎蒸事宜簡省應五
日百官起居即令押班宰臣一員押官班其轉對官兩
員封事付閣門使引進本官起居後隨百寮退不用別
出謝恩其文武内外官寮乞假寧親移家及昏葬病損
並門見門辭諸道進奉物等不用殿前排列引進使引

至殿前奏云某等進奉奏訖其進奉物便出其進奉專使朝見日班首一人致詞都附起居州刺史并行軍副使諸道馬步軍都指揮使已下差人到闕並門見門辭州縣官謝恩日甲頭一人都致詞不用逐人告官其供奉官殿直等如是當直及於合殿前排立者即入起居如不當直排立者不用每日起居委宣徽院專切點檢常須整齊從之

開運元年八月癸卯倉部郎中知制誥陶穀奏内外臣

寮正衙辭謝內則諸司小吏與宰相差肩外則屬郡末寮共元戎接武欲望宰臣使相依舊押班其郡牧藩侯臺省少監長吏等不得令部內本司卑冗官員同班辭謝勅從其奏

十一月乙亥吏部侍郎張昭遠奏文武常參官每日於正衙立班閣門使宣不坐後百僚俱拜舊制惟押班宰相押樓御史通事舍人各緣提舉贊揚所以不隨庶官俱拜自唐天成末議者不悉朝儀遽違舊典遂令押班

之職一例折腰此則深忽禮文殊乖故實且宰相居庶
寮之首御史持百職之綱嚴肅禁庭糾繩班列慮於拜
揖之際或夾進退之宜於是凝立靜觀檢其去就若令
旅拜旅揖實恐非宜況事要酌中恭須近禮人臣愛主
不在於斯其通事舍人職司贊導比者兩班進退皆相
其儀今則在文班武班之前居一品二品之上端笏齊
拜禮實未聞其押班相押樓御史通事舍人並請依天
成三年以前禮例施行無至差忒殿中侍御史賈元珪

奏是非既異沿革不同舉之則雖有舊規考之則全無
故實且夫酌人心而致禮依神道而設教此乃經國之
大端也況通事舍人居贊導之職押樓御史當糾察之
司一則示於紀綱一則防於謬誤所以靜觀進退詳視
等威實非抗禮於庭所謂各司其局俾令不拜雅合其
宜伏以宰相押班率千官而設拜起居內殿統百辟以
致詞儀刑文武之班表式鵷鷺之列不得比贊導之職
詎可同糾察之司統冠羣僚所宜列拜臣位居憲府迹

廁同班言或庶其得中罪難逃於多上帝從之

蕙田案御史司糾察舍人主贊導朝謁之時
不令一體列拜所以肅朝儀也宰相百僚之
師表既云押班自應率領諸司一體跪拜賈
元珪之議允為得中

二年六月乙丑朔帝御崇元殿百官入閣

後漢隱帝乾祐二年五月中書舍人艾穎上言近制一
月兩度入閣五日一度起居近年以來入閣多廢每遇

朔望不面天顏臣請今後朔望入閣即從常禮如不入閣即請朔望日起居冀面聖顏以伸誠敬

周太祖廣順元年四月壬辰朔帝御廣政殿羣臣起居十月壬寅雪尺餘放朝

二年十一月癸丑朔入閣

顯德元年八月壬寅朔帝御崇元殿文武百寮入閣伏衛如儀十一月辛未朔帝御崇元殿文武百官入閣伏衛如儀二年四月己亥帝御崇元殿文武百官入閣

仗衛如儀八月丁酉朔帝御崇元殿百官入閣如儀

三年六月壬戌朔帝御崇元殿文武百官入閣仗衛如儀

四年二月辛酉詔曰文武百寮起今後每遇入閣日宣賜廊餐此有唐之舊制也自晉氏多故寢而不行上以寵待廷臣故復有是命五月丁亥朔帝御崇元殿視朝太常樂懸金吾仗衛如儀八月乙卯朔帝御崇元殿文武百官入閣如儀既罷賜百官廊餐時帝御廣德殿西

樓以觀焉命中黃門閱視酒饌無不腆

右五代常朝

五禮通考卷一百三十三

欽定四庫全書

五禮通考卷一百三十四

刑部尚書秦蕙田撰

嘉禮七

朝禮

宋史禮志常朝之儀唐以宣政為前殿謂之正衙即古之內朝也以紫宸為便殿謂之入閣即古之燕朝也外又有含元殿含元非正至大朝會不御正衙則日見羣

臣百官皆在謂之常叅其後此禮漸廢後唐明宗詔羣臣每五日一隨宰相入見謂之起居宋因其制皇帝日御垂拱殿文武官日赴文德殿正衙曰常叅宰相一人押班其朝朔望亦於此殿五日起居則於崇德殿或長春殿中書門下為班首長春即垂拱也

蕙田案宋志謂古之內朝即治朝也

文獻通考宋朝因唐與五代之制文武官每日赴文明殿正衙常叅宰相一人押班五日起居即崇德長春二

殿中書門下為班首其長春殿常朝則內侍省都知押

班率內供奉官以下并寄班等先起居次閤門使次三

班使臣

注節度觀察防禦團練刺史等子弟充供奉官侍禁殿直有旨令預內朝起居者

次內

殿當直諸班

殿前指揮使左右班都虞侯以下內殿直散直散指揮散都頭金槍班等

次長

入祇候東西班殿侍次御前忠佐次殿前都指揮使率

軍校至副指揮使次駙馬都尉

任刺史以上者綴本班

次諸王府

僚次殿前司諸軍使都頭次皇親將軍以下至殿直次

行門指揮使率行門起居

以上並內侍贊謁

如傳宣前殿不坐

即宰相與樞密使文明殿學士三司使翰林樞密直學士中書舍人三司副使知起居注皇城內監庫藏朝官諸司使副內殿崇班供奉官侍禁殿直翰林醫官待詔

等同班入

中書舍人乾德後始令赴內朝三司判官太平興國前赴內殿其後罷之止隨百官五日

起居中書舍人知起居注遇五日起居之時亦各付外朝次親王次侍衛親軍馬步

軍都指揮使率軍校至副指揮使次使相次節度使次統軍次兩使留後觀察使次防禦團練使刺史次侍衛馬軍步軍使都頭起居畢見謝班入如御崇德殿即樞

密使以下先就班俟升坐

諸司使副以下至殿直分東西對立餘皆北向長春殿皆

北宰相參知政事最後入

以上並閣門贊謁

日止再拜朔望及

三日假即樞密使以下皆舞蹈國初近侍執事之臣皆

赴晚朝後罷之凡早朝宰相樞密宣徽使起居畢同升

殿問聖體宰相奏事樞密宣徽使退候宰相對畢樞密

使復入奏事次三司開封府審刑院

遇百官起居即樞密宣徽使侍立俟

左右巡使出即退其崇德殿三司使文明樞密直學士
內客省使仍侍立舊三司使奏事副使判官同對其後
止副使同之大中祥符九年詔
自今有大事許判官同上之及羣臣以次升殿

大兩省以

上領務京師者有公事許即請對自餘受其見謝辭官使出入要切者欲而議奏事則先聽進止

以次入於庭

出使閑慢及未升朝官或止拜於殿門外自秘書監上將軍觀察使內客省使以上得拜

殿前階上及升殿止拜御座前餘皆庭中也

凡見者先之謝次之辭又次之

其班

次先宰相次親王次樞密副使參知政事次內職內臣次使三司學士兩省御史臺文武班節使以下次將軍校次雜班

惟宰相親王使相赴崇德殿即宣徽使通喚餘皆側立

候通再拜舞蹈致詞辭即不舞蹈見即將相升殿問聖

體其賜分物酒食及収進奉物皆舞蹈稱謝

凡収進奉物皆入謝

幕職州縣官謝辭即判銓官引對兼於殿門外宣辭戒

勵凡國有大慶瑞出師勝捷樞密使率內職軍校入賀
致詞閣門使宣答訖當侍立者升殿次百官入宰相致
詞宣徽使宣答賜酒即預坐官後入作樂送酒如曲宴
之儀

凡視朝退進食訖易服御崇政殿或承明殿先羣臣

告謝

注自諫舍知雜御史以上及帶三司館王府僚屬歷官醫官刺史以上上將軍并發運使轉運

使并許焉自非宣制並捧官告勅叙謝其貴近者或賜坐賜茶餘或改章服即謝訖易服又告謝再拜

次軍頭引見司奏事於殿陛下次三班審官院流內

銓刑部及諸司引見官吏

後詔審官引對京朝官奏課不得過三人差遣不得

過五人三使部選人差遣不得過十人

如假日起居辭見畢即移御座

臨軒視事既退復有羣司奏或閱器物之式謂之後殿再坐

蕙田案宋制每日常參五日起居並稱常朝
文獻通考所云長春殿常朝宋志謂之垂拱
殿起居其實一也

宋史禮志建隆元年八月朔太祖常服御崇元殿設仗

衛文武百官入閣始置待制候對官乃以工部尚書竇儼待制太常卿邊光範候對仗退賜食廊下

文獻通考五代以來廢正衙立仗而入閣亦希闊不講至是復行之然御前殿非唐舊矣崇元殿即大慶殿前殿也待制候對者亦唐制也每正衙待制官兩員正衙退後又令六品以下於延英候對皆所以備顧問其後每入閣即有待制次對官後唐天成中廢至是復行之廊下食起唐貞觀其後常參官每日朝

退賜食謂之廊餐唐末浸廢但於入閣起居日賜食
今循其制

文獻通考建隆三年三月詔內殿起居日令百官以次
轉對限三人為定其封章於閣門通進復鞠躬自奏宣
徽使承旨宣答拜舞而出

宋史禮志乾德四年四月朔帝服通天冠絳紗袍御崇
元殿視朝設金吾仗衛羣臣入閣

文獻通考六年九月始以旬假日御講武殿近臣但赴

早叅

宰相以下皆具靴笏
諸司使以下皆係鞵

其節假及太祠並如令式處

分

蕙田案宋史禮志原注講武殿又名崇政

宋史禮志開寶九年四月詔旬休日不視事

文獻通考太宗即位旬休日復視事講武殿其後又詔
自今内外百司除舊制給假外每月旬假上巳社重午
重陽並休務一日三司開封府事關急速不在此限遇
初寒盛暑大雨雷雪當議放朝

宋史禮志太宗淳化二年十一月詔以十二月朔御文德殿入閣令史官脩撰楊徽之張洎定為新儀前一日

有司供帳於文德殿

宋初曰文明

是日既明先列文武官於

殿庭之東西百官軍校行軍副使等序班於正衙門外屏南階下次御史中丞三院御史序立中丞獨穿金吾班過揖兩班一揖歸本位次監察御史兩員監閣於正衙門外屏北階上北面立次中書門下文明翰林樞密直學士兩省官分班立次司天奏辰刻次閣門版奏班

齊皇帝服韡袍乘輦至長春殿駐輦樞密使以下奏謁
前導至文德殿殿上承旨索扇捲簾皇帝升位扇却儀
鸞使焚香次文武官等拜次司天雞唱次閣門勘契次
閣門使承旨呼四色官喚仗南班有辭謝者再拜先退
中書門下班對揖序立正衙門外屏北階上次翰林學
士兩省官中丞侍御史序立次金吾將軍押細仗入正
衙門後橫行拜訖分行上黃道仗隨入金吾將軍至龍
墀分班揖訖序立次吏部侍郎執文武班簿入對揖立

次中書門下學士兩省御史臺官入北面拜訖上黃道
將至午階敝鞞急趨赴丹墀彈奏御史至吏部侍郎南
便落黃道急趨就位起居郎舍人至兵部吏部侍郎後
急趨而進飛至香案前皆揖訖序立次金吾大將軍先
對揖並鞠躬敝鞞行至折方石位又對揖北行至奏事
石位鞠躬一員奏軍國內外平安倒行就位次引文武
班就位揖訖鞠躬敝鞞急趨入沙墀次引侍從班橫行
宰相祝月起居畢分班序立文武兩班出序立於衙門

外刑法待制官赴監奏位中書門下夾香案侍立兩省御史臺官學士兵部吏部侍郎金吾將軍監閣御史並相次出就衙門外立

惟學士立門側北候宰使

中書門下詣香案前

奏曰中書公事臣等已具奏聞訖乃退揖殿出次刑法官待制官各奏事並宣徽使答訖乃出就班次彈奏官左右史出閣內失儀者彈紀如式彈奏官失儀起居郎紀之起居郎失儀閣門使紀之閣門使失儀宣徽使紀之凡出者皆蔽鞞急趨揖殿次中書門下學士就位閣

門使宣放仗再拜賜廊下食又再拜次閣門使奏閣內
無事文武官出殿上索扇垂簾輦還宮其賜廊下食自
左右勤政門北東西兩廊文東武西以北為上立定中
丞至本位面南一揖乃就坐食至臺史贊乃搢笏食食
訖復贊食畢而罷五月朔命有司增黃麾仗三百五十
人令文武官隨中書門下橫行起居徙翰林學士位於
參知政事後與節度使分東西揖殿出真宗凡三行之
景德以後其禮不行

揮麈後錄時江南張洎獻狀述朝會之制得失明著其要云今之乾元殿即唐之含元殿也在周為外朝在唐為大朝冬至元日立金仗朝百國在此殿也今之文德殿即唐之宣政殿在周為中朝在漢為前殿在唐為正衙凡朔望起居冊拜后妃皇太子王公大臣對四夷君長試制策科舉人在此殿也昔東晉太極殿有東西閣唐制紫宸上閣法此制也且人君恭已南面嚮明而理紫微黃屋至尊至重故巡幸則有

大法駕從之盛御殿則有勾陳羽衛之嚴故雖隻日
常朝亦猶立仗前代謂之入閣儀者蓋隻日御紫宸
上閣之時先於宣政殿前立黃麾金吾仗候勘契畢
喚仗即自東西閣門入故謂之入閣今朝廷且以文
德正衙權宜為上閣甚非憲度況國家繼百王之後
天下昇平凡曰憲章咸從損益惟視朝之禮尚自因
循竊見長春殿正與文德殿南北相對殿前地位連
橫街亦甚廣博伏請改創此殿作上閣為隻日立仗

視朝之所其崇政殿即唐之延英是也為雙日常時
聽斷之所庶乎臨御之式允協前經今論以入閣儀
注為朝廷非常之禮甚無謂也

蔥田案張洎論入閣之說當矣宋初去五代
未遠故承其悞至熙寧始罷入閣之禮

初羣臣見辭謝皆赴正衙淳化二年知雜御史張郁言
正衙之設謂之外朝凡羣臣辭見及謝先詣正衙見訖
御史臺具官位姓名以報閣門方許入對此國家舊制

也自乾德後始詔先赴中謝後詣正衙而文武官中謝後次日並赴正衙內諸司遙領刺史閤門通事舍人以上新授者亦赴正衙辭謝出使急速免衙辭者亦具狀報臺違者罰俸一月其內諸司職官并將校至刺史以上新授者欲望同百官例赴正衙謝從之

淳化二年詔自今內殿起居日復令常參官二人次對閤門受其章

太宗本紀淳化三年五月甲午朔御文德殿百官入閤

文獻通考是歲令有司復舉十五條一朝堂行私禮
二跪拜三待漏行立失序四談笑喧嘩五入正衙門
執笏不端六行立遲緩七至班列行立不正八趨拜
失儀九言語微喧十穿班仗十一閣門不即就班十
二無故離位十三廊下食行坐失儀語喧十四不從
正衙門出入十五非公事入中書犯者罰一月俸有
司振舉拒不伏者錄奏乞行貶降其後每罰減半

真宗本紀咸平二年八月辛亥御文德殿文武百官入

閣

禮志真宗咸平三年五月朔雨命放仗百官常服起居於長春殿退詣正衙立班宣制

咸平六年命翰林學士梁顥等詳定閣門儀制成六卷因上言三司副使序班朝服比品素無定列至道中筵會在知制誥後郎中前今請同諸司少卿監班位在上如官至給諫卿監者自如本品朝會大宴隨判使赴長春殿起居引駕其朝會引駕至前殿與諸司使同退

景德二年光祿寺丞錢易言竊覩文德殿常朝班不及
三四十人蓋以凡掌職務止赴五日起居頗違舊章望
令並赴朝參乃詔應三館祕書閣尚書省二十四司諸
司寺監朝臣內殿起居外並赴文德殿常參其審刑院
大理寺臺直官開封府判官推官司錄兩縣司天監翰
林天文監倉場庫務等仍免

三年復詔羣臣轉對其在外京官內殿崇班以上候得
替先具民間利害實封於閣門上進方得朝見

大中祥符二年御史知雜趙湘言伏見常叅官每日趨朝多不整肅舊制並早赴待漏院候開內門齊人伏緣每日迨辰以朝以故後時方入又風雨寒暑即多稱疾宜令知班驅使官視其入晚者申奏疾者遣醫親視

真宗本紀大中祥符三年閏二月辛亥帝御文德殿羣臣入閣

禮志大中祥符四年閏三月太常禮院閣門言準詔同詳定閣門使李端懿所奏閣門儀制宰臣與親王立班

坐位分左右各為班首宰臣樞密使帶使相或帶郡王
并使相作一行總為中書門下班其親王獨行一班者
準對爵令兄弟皇子皆封國謂之親王所以他官不可
參綴檢會坐次圖直將宗室使相輒綴親王盖更張之
時未見親王遂致失於講求近見朝拜景靈宮東陽郡
王顥亦綴親王班竊恐未安今所到閣門儀制其合班
宰臣使相在東親王在西分班立又祥符元年晏坐次
圖宰臣王旦與使相石保吉在東寧王元偓舒王元偁

廣陵郡王元儼節度使惟吉在西分班坐其元儼惟吉是郡王與節度使許綬親王班竊慮當時出自特旨今來檢尋元初文字不見在先朝只依祥符元年晏坐次圖親王及帶使相郡王在西為一班臣等參詳請依閣門儀制親王在西獨為一班宗室郡王帶使相許綬親王立班坐次即係臨時特旨從之

職官志大中祥符九年正月興利州團練使德文言男侍禁承顯赴起居請在惟忠子從恪之上時從恪雖姪

行而拜職在前遂詔宗正寺定宗室班圖以聞宗正言
案公式令朝叅行立職事同者先爵爵又同者先齒今
請宗子官同而兄叔次第姪者並虛一位而立

真宗本紀天禧元年秋七月丁未霖雨放朝十二月丙
子嚴寒放朝 四年九月己未久雨放朝冬十月戊寅
命依唐制雙日不視事十一月辛未詔自今羣臣五日
於長春殿起居餘隻日視朝於承明殿

禮志天禧四年十月中書門下言唐朝故事五日一開

延英隻日視事隻日不坐方今中外晏寧致刑清簡望
準舊事三日五日一臨軒聽政隻日視事隻日不坐至
於刑章錢穀事務遣差臣僚除急切大事須面對外餘
並令中書樞密院附奏詔禮儀院詳定隻日前後殿不
坐隻日視事或於長春殿或於承明殿應內殿起居羣
臣並依常日起居餘如中書門下之儀俄又請隻日承
明殿常朝依假日便服視事不鳴鞭詔可

真宗本紀天禧五年冬十月壬子依漢唐故事五日一

受朝遇慶會皇太子押班

仁宗本紀景祐元年九月壬辰百官請隻日御前殿如
先帝故事詔可

宋庠傳庠寶元中以諫議大夫參知政事庠儒雅練
習故事嘗從容論及唐入閣儀庠退而上奏曰入閣
乃有唐隻日於紫宸殿受常朝之儀也唐有大內又
有大明宮宮在大內之東北世謂之東內高宗以後
天子多在大明宮之正南門曰丹鳳門門內第一殿

曰含元殿大朝會則御之第二殿曰宣政殿謂之正衙朔望大冊拜則御之第三殿曰紫宸殿謂之上閣亦曰內衙隻日常朝則御之天子坐朝須立仗於正衙殿或乘輿止御紫宸即喚仗自宣政殿兩門入是謂東西上閣門也以本朝宮殿視之宣德門唐丹鳳門也大慶殿唐含元殿也文德殿唐宣政殿也紫宸殿唐紫宸殿也今欲求入閣本意施於儀典須先立仗文德庭如天子止御紫宸即喚仗自東西閣門入

如此則差與舊儀合但今之諸殿比於唐制南北不相對又案唐自中葉以還雙日及非時大臣奏事別開延英殿若今假日御崇政延和是也乃知唐制無過坐朝日即為入閣其後正衙立仗因而遂廢甚非禮也

康定元年六月丙戌詔假日御崇政殿視事如前殿禮志康定初詔中書樞密三司大節大忌給假一日小節旬休並後殿奏事前後毋得過五班餘聽後殿對御

廚給食假日崇政殿辰漏上入內進食俟再坐復對

文獻通考英宗治平四年詔御史臺每遇起居日令百僚轉對御史臺請依閣門儀制輪兩省及文班秩高者二員於百官起居日轉對若兩省官有充學士待制則綴樞密班起居內朝臣僚不與詔從之又詔遇轉對日增二員

神宗即位御史中丞王陶以皇祐編勅宰臣押班儀制移中書謂天子新即位大臣不應墮廢朝儀不報舊制

祖宗以來日御垂拱殿待制諸司使以上俱赴而百官班文德殿曰常朝五日皆入曰起居平時宰相垂拱殿奏事畢赴文德殿押班或日昃未退則閤門傳宣放班多不復赴王陶以韓琦曾公亮違故事不押班為不恭劾之琦公亮上表待罪且言唐及五代會要月九開延英則餘日宰相當押正衙班及延英對日未御內殿前傳宣放班則宰相不押正衙班明矣自祖宗繼日臨朝宰相奏事至祥符初始詔循故事押文德班以妨職浸

廢乃至今日請下太常禮院詳定陶坐紉司馬光代為
中丞請令宰相遵國朝舊制押班不須詳定尋詔宰相
春分辰初秋分辰正垂拱殿未退聽勿赴文德殿令御
史臺放班光又言垂拱奏事畢春分以後鮮有不過辰
初秋分以後鮮有不過辰正然則自今宰臣常不至文
德殿押班請春分辰正秋分巳初奏事未畢即如今詔
庶幾此禮不至遂廢廼詔春秋分率以辰正

文獻通考熙寧元年詔自今授外任者許令轉訖朝辭

宋史禮志熙寧初閣門言舊制中書省樞密院奏事退再引三班假日則兩班或再御後殿引對多及午刻遇開經筵即至申末恐久勞聖躬請遇經筵日自二府奏事外止引一班或有急奏及言事官請對即取旨俟罷經筵日仍舊又言假日御崇政殿每遇辰時則隔班過延和殿再引不待進食至巳刻隔班取旨尚許引對請自今隔班過延和殿俟已進食再引遇寒暑大風雨雪即令次日引對詔自今授外任者許令轉對訖朝辭監

察御史裏行張戡程顥言每欲奏事必俟朝旨或朝政有闕及聞外事而機速後時則已無所及況往復俟報必由中書萬一事干政府則或致阻格請依諫官例牒閣門求對或有急奏即許越次登對庶幾遇事入告無憂失時又以編脩閣門儀制所言三衙有急奏許於後殿登對若別有奏陳則報閣門如常制或假日御崇政殿則於已得旨對班後續引且許兩制以上同班奏事

蕙田案文獻通考載張戡程顥奏在熙寧二

年

文獻通考熙寧三年知制誥宋敏求等言文德殿入閣
儀制考之國朝會要與今儀制所載頗或異同案今文
德殿唐宣政殿也紫宸殿唐紫宸殿也然祖宗朝皆嘗
御文德殿入閣唐制嘗設仗衛於宣政殿或遇上坐紫
宸即喚仗入閣如此則當御紫宸殿入閣方協舊制請
下兩制及太常禮院詳定詔學士院議翰林學士承旨
王珪等言案入閣者乃唐雋日紫宸殿受常朝之儀也

唐制天子坐朝必立仗於正衙若止御紫宸即喚正衙
仗自宣政殿東西閣門入故為入閣五代以來遂廢正
衙立仗之制今閣門所載入閣儀者止是唐常朝之儀
非為盛禮不可遵行從之自是入閣之禮遂罷敏求又
言本朝以來惟入閣乃御文德殿視朝今既不用入閣
儀即文德殿遂闕視朝之禮請下兩制及太常禮院約
唐制御宣政殿裁定朔望御殿儀以備正衙視朝之制
詔學士院詳定儀注學士韓維等以入閣圖增損裁定

上儀曰朔日不值假前五日閣門關諸司排辦前一日
有司供帳於文德殿其日左右金吾將軍常押本衛仗
判殿中省官押細仗先入殿庭東西對列文武官等分
東西序立諸將軍校分入北向立朝堂引贊官引彈奏
御史二員入殿門踏道當下殿北向立次催文武班分
入並東西相向對立諸軍將校即於殿庭北向立班
其班
次並御史 皇帝服靴袍垂拱殿坐鳴鞭內侍閣門管軍
臺祇應
依朔望常例起居次引樞密宣徽使三司使副樞密直

學士內閣省使以下至醫官待詔及修起居注官二員並大起居皇帝乘輦至文德殿後閣門奏班齊皇帝自後閣出殿上索扇升榻鳴鞭扇開簾捲儀鸞使焚香唱文武官就位四拜起居雞人唱時舍人於彈奏御史班前西向喝大起居御史由文武班後至對立位次引左右金吾將軍合班於宣制石南大起居班首出班躬奏軍國內外平安歸位再拜各歸東西押仗位通喝舍人於宣制石南北向對立舍人退於西階次揖宰臣親王

以下躬奏文武百僚宰臣某姓名以下起居分引宰臣

以下橫行諸軍將校仍舊立閣門使喝大起居舍人引

宰臣至儀石北俛伏跪致詞祝月訖其詞曰文武百僚宰臣全銜臣某姓

名等言孟春之吉伏惟皇帝陛下膺受時社與天無窮臣等無任懼呼忭蹈之至歸位五拜閣

門使揖中書由東階升殿樞密使帶平章事以上由西

階升殿侍立給事中一員以知門下封駁事官充歸左省位立轉

對官立於給事中之南如罷轉對官每遇御史臺前期牒請大官二員並依轉對官立例

先于閣門投進奏狀吏部侍郎及刑法官官立於轉對官之南兵部

侍郎於右省班南與吏部侍郎東西相向定搢笏各出

班籍置笏上

吏部兵部侍郎以知審官東西院官充刑法官以知審刑大理寺官充

親王

使相以下分班出引轉對官於宣制石南宣徽使殿上

承旨宣答如儀次吏部兵部侍郎及刑法官對揖出

見謝

辭班自
從別儀

次彈奏御史無彈奏對揖出

如有彈奏
並如儀

引給事

中至宣制石南揖躬奏殿中無事喝祇候揖西出次引
修起居注官排立供奉官以下各合班於宣制石南躬
喝祇候揖分班出喝文武官等門外祇候出索扇垂簾

皇帝降座鳴鞭舍人當殿承旨放仗四色官轎鞞急趨至宣制石南稱奉勅放仗金吾將軍并判殿中省官對拜訖隨仗出親王使相節度使至刺史學士臺省官文武百僚諸軍將校等並序班朝堂謝賜茶酒皇帝御垂拱殿座中書樞密及諸對官奏事不引見謝辭班後殿座臨時取旨其日遇有德音制書御札仍候退御垂拱殿座制箱出外應正衙見謝辭文武臣僚並依御史臺儀制喚班依序分入於文武班後以北為首分東西相

向重行異位依見謝辭班序位餘押班臣僚於班稍前
押班候刑法官對揖出分引近前揖躬舍人當殿宣班
引轉對班見謝辭並如紫宸殿儀樞密使不帶平章事
參知政事至同簽書樞密院事宣徽使並立於宣制石
稍北宰相親王樞密帶平章事使相繫押班者立於儀

石南

餘官並立于宣制石南並合贊喝閣門使

引並如儀贊喝訖係中書樞

密並揖升殿謝辭揖西出其合問聖體者並如儀餘官

分班出

彈奏御史候見謝辭班絕對揖出其朝見如謝都城門外御筵及詔赴闕謝茶藥撫問之類不

可合班者各依別班中謝對賜酒食等並應正衙見謝門賜其係正衙見門謝辭亦門外喝放

辭臣僚前一日於閣門投諸正衙膀子閣門下奏目又投正衙狀於御史臺四方館應朔日或得旨罷文德殿視朝止御紫宸殿起居其已上奏目正衙見謝辭班並放免依官品隨赴紫宸殿引或值改依常朝文德殿自有百官班日並如舊儀應外國蕃客見辭候喚班先引赴殿庭東邊依本國職次重行異位立候見謝辭班絕西向躬舍人當殿通班轉於宣制石南北向立贊喝如

儀西出其酒食分物並門賜如有進奉候彈奏御史出

入進奉入

惟御馬及檐牀自殿西偏門入東偏門出其進奉出入文武官起居舍人通某國進奉宣

徽使喝進奉出節次如紫宸殿儀式

候進奉出給事中奏殿中無事出其

後殿再座合引出者從別儀其日賜茶酒宰臣樞密於

閣子親王於本廳使相宣徽使觀文殿大學士至寶文

閣直學士兩省官待制三司副使文武百官皇親使相

以下至率府副率及四廂都指揮使以下至副都頭並

於朝堂

如朝堂位次不足即于朝堂門外序次

管軍節度使至四廂都指

揮使節度使兩使留後至刺史並於客省廳詔依所定
宋史禮志熙寧六年正月西上閤門副使張誠一言垂
拱殿常朝先內侍唱內侍都知以下至宿衛所門計一
十八班起居後通事舍人引宰執樞密使以下大班入
次親王次侍衛馬步軍都指揮以下次皇親使相以下
十班入方引見謝辭或遇百官起居日自行門後通事
舍人引樞密以下次親王使相以下至刺史十班入方
奏兩巡使起居立定方引兩省官入次閤門引宰臣以

下大班入起居畢候百官出絕兩省班出次兩巡使出
中書樞密方奏事已是日高況大班本不分別丞郎給
諫臺省及常叅官今獨使相以下曲為分別虛占時刻
請御垂拱殿百官起居日將親王以下十班合為四班
親王為一班侍衛馬步軍都指揮使為一班親王使相
以下至刺史重行異位為兩班可減六班如垂拱殿常
朝不係百官起居或紫宸殿百官起居其親王使相以
下班並依舊儀序入起居從之

神宗本紀熙寧七年八月集賢院學士宋敏求上編修
閣門儀制

禮志元豐中官制行始詔侍從官而上日朝垂拱謂之
常叅官百司朝官以上每五日一朝紫宸為六叅官在
京朝官以上朔望一朝紫宸為朔叅官望叅官遂為定
制

神宗本紀元豐三年二月丙辰始御崇政殿視朝五月
乙丑詔自今三伏內五日一御前殿

文獻通考三年九月引進使李端慤言近朔望御文德殿視朝初寒盛暑數煩清蹕而紫宸朝歲中罕御請朔日御文德既望坐紫宸庶幾正衙內殿朝儀並舉從之
惠田案宋史禮志載李端慤奏在熙寧六年
今以通考為定

宋史禮志元豐既定朝參之制侍御史知雜事蒲中行上言文德正衙之制尚存常朝之虛名襲橫行之謬例有司失於申請未能釐正兩省臺官文武百官赴文德

殿東西相向對立宰臣一員押班間傳不坐則再拜而退謂之常朝遇休假并三日以上應內殿起居官畢集謂之橫行自宰臣親王以下應見謝辭者皆先赴文德殿謂之過正衙然在京釐務之官例以別勅免叅宰臣押班近年已罷向武班諸衙本朝又不常置故今之赴常朝者獨御史臺官與審官待次階官而已今垂拱內殿宰臣以下既已日叅而文德常朝仍復不廢舛謬倒置莫此為甚至於橫行叅假與夫見謝辭官先過正衙

雖沿唐之故事然必俟天子御殿之日行之可也詔下
詳定官制所言今天子曰聽政於垂拱以接執政官及
內朝之臣而更於別殿宣勅不坐實為因習之誤兼有
執事升朝官五日一赴起居而未有執事者反謂之叅
疏數之節尤為未當又辭見謝自己入見天子則前殿
正衙對拜為虛文其連遇朝假則百官司赴大起居不
當復有橫行叅假宜如中行言於是常朝正衙橫行之
儀俱罷

元豐中詔尚書侍郎同郎官一員奏事郎中員外郎番
次隨之不許獨留身侍郎以下亦不許獨請奏事其左
右選非尚書通領者聽侍郎以上郎官自隨秘書殿中
省諸寺監長官視尚書貳丞以下視侍郎又詔三省樞
密院獨班奏事日無得過三班若三省俱獨班則樞密
院當請奏事其見任官召對訖次日即朝辭回任聽旨
元豐八年二月詔諸三省御史臺寺監長貳開封府推
判官六叅職事官赤縣丞以上寄祿升朝官在京釐務

者望叅不釐務者朔叅

哲宗本紀元祐五年五月壬午詔文彥博班宰相之上
禮志元祐元年五月詔太師平章軍國重事文彥博已
降旨令獨班起居自今赴經筵都堂同三省樞密院事
並序位在宰相之上

元祐四年十月以戶部尚書呂公孺言詔朔叅官兼赴
望叅望叅官兼赴六叅

哲宗本紀元祐五年夏四月癸丑詔講讀官御經筵退

留二員奏對邇英閣丁巳詔以旱避殿減膳罷五月朔
日文德殿視朝

禮志元祐中宰臣呂大防言昨垂簾聽政惟許臺諫以
二人同對故不正之言無得以入今陛下初見羣臣請
對者必衆既人人得進則善惡相雜故於采納尤難帝
曰人君以納諫為上然邪正則不可不辨遂詔上殿班
當直牒及帥臣國信使副許依元豐八年以前儀制
哲宗本紀元祐七年五月庚子罷侍從官轉對

紹聖四年四月己酉復文德殿侍從轉對

禮志紹聖初臣僚言文德殿視朝輪官轉對蓋襲唐制故祖宗以來每遇轉對侍從之臣亦皆預焉元祐間因言者免侍從官轉對續詔執事官權侍郎以上並免自此轉對止於卿監郎官而已請自今視朝轉對依元豐以前條制

蕙田案侍從輪官轉對下情得以上達此唐宋良法也元祐免侍從轉對自此轉對止於

卿監郎官而已紹聖中臣僚請依元豐已前
條制是也惜其時惇卞柄政附從皆僉壬耳

又詔自今三省樞密院進擬在京文臣開封府推判官
武臣橫行使副在外文臣諸路監司藩郡知州武臣知
州軍以下取旨召對臣僚言每緣職事請對待次旬日
遇有急奏深恐失事請自今後許依六曹開封例先次
挑班上殿仍不隔班又言諸路監司朝廷所選以推行
法令省問風俗朝辭之日當令上殿六曹尚書如有職

事奏陳許獨員上殿其羣臣請對雖遇休假特御便殿聽納既又詔應節鎮郡守往令陞辭歸許登對不特審觀人材亦所以重外任也可於監司不許免對條下增入節鎮郡守依此十月御史臺言外任官到闕朝見訖並令赴朔望叅尋又言元豐官制朝叅班序有日叅六叅望叅朔叅已著為令元祐中改朔叅兼赴望叅望叅兼赴六叅有失先朝分別等差之意止依元豐儀令從之

徽宗本紀崇寧五年十二月壬戌詔臣僚休日請對特御便殿

禮志政和詳定五禮新儀有文德殿月朔視朝儀紫宸殿望衆儀垂拱殿四衆儀紫宸殿日衆儀垂拱殿日衆儀紫宸殿再坐儀崇政殿假期起居儀其文不載

文獻通考重和元年臣僚言比年以來二三大臣奏對留身讒疏善良請求相繼甚非朝廷至公之體詔自今惟蔡京五日一朝許留身餘非除拜選秩因謝及陳乞

罷免並不許獨班奏事令閣門報御史臺彈劾

蕙田案此蔡京箝制朝官沮塞言路所為豐亨之說日陳於上諂媚之風日成於下上壅蔽而不聞臣專擅而無忌汴宋之所以亡也宋史徽宗本紀宣和四年十二月乙未詔監司未經陞對毋得之任

禮志臣僚言祖宗舊制有五曰一轉對者今惟月朔行之有許朝官轉對者今惟待制以上預焉自明堂行視

朔禮歲不過一再則是畢歲而論思者無幾請遇不視
朔即令具章投進以備覽觀又諸路監司未經上殿者
雖從外移先赴闕引對方得之官並從其議

高宗本紀建炎三年二月丁卯百官入見應迪功郎以
上並赴朝叅

紹興二年五月戊子手詔用建隆故事命百官日輪一
人轉對

七年冬十月丁巳詔六叅日輪行在百官一員轉對

十三年二月壬戌初御前殿特引四叅官起居

孝宗本紀紹興三十二年五月壬辰詔百官日一人入對

文獻通考紹興三十二年九月閣門言太上皇帝巡幸以來上御後殿繼朝廷復興舊典於紹興十三年二月初四日初御前殿特令四叅官起居伏自皇帝登寶位止係後殿日分今已降旨九月十二日初御前殿欲乞是日皇帝御垂拱殿四叅官起居從之

隆興二年九月閣門言在京及行在舊例御前殿日分
值雨雪及泥濘得旨放朝叅即改後殿坐今後乞依例
取旨從之

朝野雜記舊羣臣朝殿遇雨開隔門起居紹興中申
行之又詔從駕遇雨賜雨具景靈宮遇雨或地濕分
東西廂立班皆特恩也

宋史禮志孝宗乾道二年九月閣門奏垂拱殿四叅

四叅

官謂宰執侍從武臣正任文
臣卿監員外監察御史以上皇帝坐先讀奏目知閣以

下次御帶環衛官以下次忠佐殿前都指揮使以下次
殿前司員僚次皇太子次行門以上逐班並常起居次
樞密學士待制樞密都承旨以下知閣并祗應武功大
夫以下通班常起居次親王次馬步軍都指揮使次使
相次馬步軍員僚以上逐班並常起居次殿中侍御史
入側宣大起居訖歸侍立位次宰執以下並兩省官文
臣百官入相向立定通班面北立大起居訖

凡常起居
兩拜大起

居七
拜

三省升殿侍立次兩省官出次殿中侍御史對揖

出三省樞密院奏事次引見辭謝次引臣僚奏事訖皇帝起詔今後遇四叅日分起居班次可移殿中侍御史及宰執以下百官班令次樞密以下班起居却令親王并殿前都指揮使以下殿前司員僚逐班於宰執以下班後起居餘並從之

文獻通考乾道七年四月詔為暑熱依年例自五月十三日並後殿坐并放見謝辭及叅假官候秋涼日取旨今後准此

孝宗本紀七年十二月庚申詔閣門舍人依文臣館閣以次輪對

淳熙七年九月癸亥詔自今常朝毋稱丞相名甲子命樞密使亦如之


禮志寧宗嘉定十二年正月臣僚奏竊見皇帝御正殿或御後殿固可間舉四叅官亦有定日近者每日改常朝為後殿四叅之禮亦多不講正殿後殿四叅間免陛下臨朝之日固未嘗輟而外廷不知聖意或謂姑從簡

便非所以肅百執事也常朝之禮止於從臣後殿之儀
從臣不與四叅止及卿郎而乃累月僅或一舉咫尺天
威踈簡至此非所以尊君上而勵百辟也伏願陛下嚴
常朝後殿四叅之禮起羣下肅謹之心彰明時勵精之
治豈不偉哉從之

老學庵筆記先君言舊制朝叅拜舞而已政和以後
增以喏然紹興中予造朝已不復喏矣淳熙末還朝
則迎駕起居閣門亦喝唱喏然未嘗出聲也又紹興
中朝叅止磐折遂拜今閣門習儀先以笏叩額拜謂
之瞻笏亦不知起於何年

二老堂詩話歐公詩云玉勒爭門隨仗入牙牌當殿
報班齊或疑其不然今朝殿爭門者往往隨仗而入
及在建排立既定駕將御殿閣門持牙牌刻班齊二
字候班齊小黃門接入上先坐後幄黃門復出揚聲
云人齊未行門當頭者應云人齊上即出方轉照
壁衛士即鳴鞭然此乃是駕出時常日則不同

右宋常朝



五禮通考卷一百三十四